

**Pembangunan UiTM Raub, Institut Latihan UiTM Antara Usaha Tambah Enrolmen Pelajar Bernama
25 Julai, 2012**

PUTRAJAYA, 25 Julai (Bernama) -- Projek pembangunan kampus Universiti Teknologi Mara (UiTM) di Raub, Pahang dan Institut Latihan UiTM di Nilai, Negeri Sembilan adalah kesinambungan kepada agenda negara untuk menambah enrolmen pelajar UiTM dari 100,000 kepada 200,000 pelajar menjelang 2015.

Ketua Setiausaha Kementerian Pengajian Tinggi Datuk Ab Rahim Md Noor berkata kedua-duanya adalah projek ketiga dan keempat daripada enam projek fasa dua pembangunan kampus UiTM secara Inisiatif Pembiayaan Swasta (IPF) yang dijadualkan pelaksanaannya dalam tempoh Rancangan Malaysia Ke-10.

"Kampus UiTM Raub membabitkan kos pembinaan sebanyak RM230 juta dan boleh menempatkan 3,000 pelajar. Ia akan dibina di tapak seluas 31.6 hektar di Mukim Gali, Raub-Bentong," katanya.

Beliau berkata demikian pada majlis menandatangani perjanjian konsesi bersama Utusan Intelek Sdn Bhd yang akan membina kampus UiTM Raub dan Menang Corporation (M) Berhad melalui anak syarikatnya Protokol Elegan Sdn Bhd yang akan membangunkan Institut Latihan UiTM, di sini, Rabu.

Ia ditandatangani Ab Rahim yang mewakili kementerian, Naib Canselor UiTM Prof Datuk Dr Sahol Hamid Abu Bakar, wakil Utusan Intelek Muhammad Hariri Abd Majid dan Pengerusi Eksekutif Protokol Elegan Sdn Bhd Datuk Abdul Mokhtar Ahmad, yang disaksikan Menteri Pengajian Tinggi Datuk Seri Mohamed Khaled Nordin.

-- BERNAMA

Copyright © 2012 BERNAMA

Source: <http://www.bernama.com/bernama/v6/bm/newsindex.php?id=683103>

